

四庫全書

集部

欽定四庫全書

宋元詩會卷九十九

兵部主事陳焯編

熊磻谷

木綿歌

秋陽收盡枝頭露
烘綻青囊翻白絮
田婦攜筐採得歸
渾家指作機中布
大兒來覓襦
小兒來覓袴
半擬償私債
半擬輸官府
竹籠旋著活火熏
蠹蟲母子走紛紛
尺

鐵碾出瑤空雪一弓彈破秋江雲中虛外縱搓成索畫
夜踏車聲落落車聲纔冷催上機知作誰人身上衣小
女背面臨風泣憶曾隨母園中拾

劉時中

采蓮曲

長安女兒淑且濃日日采蓮溪水中笑插荷花照溪水
韶容欲與花爭紅溪中荷花演幾許溪上時時聞笑語
紅酣綠縵不見人應在荷花更演處歸來夜涼溪水清

扣舷踏歌蕩槳行荷葉葢頭花壓鬢溪上月明潮已平

胡尊生

聞官伐松

大夫去作屋梁材無復清陰護綠苔只恐江頭明月夜
誤他千里鶴歸來

黃玠

碧瀾妾歌

感之以誠感必深應之以真應必捷真情一合了弗離

聽我長歌碧瀾妾碧瀾亦是諸王孫世殊事異老且貧
少陵尚愛燕玉暖況是當時真貴人春衣典盡春寒悄
二妾朱顏正姝好忍將羅帶折同心懊恨浮生頭白早
珠鈿翠靨幸僅存此時猶及嫁夫君十二樓頭燕子去
揮手不可畱僊裙去妾相悲兩相約既去猶煩送殽酌
主君詎忍覆棄之見此翻令心緒惡一心事天天得知
忍著主衣還事誰遂攜衾襖與俱至後君死者當為尼
碧瀾堂下雙溪水使客往來豈知此不願新歡戀舊思

千萬人中兩人耳

蕭應元

初夏

半清半和白晝長似無似有綠陰香
兒童刺竹記新筍
一夜風吹一尺強

劉宗遠

山中夢母

霜月照屋壁霜風湧江波
終夕不能寐展轉思懷多
忽

夢吾母來宛然度山阿但問兒衣薄語短不及他兒寒
尚可忍地下知如何

徐甫

寓言

苦樂有冥定結髮與君婚中道棄我去白馬駕華軒燕
趙足佳麗吳楚多嬋媛妾自守空房蠨蛸網妾門妾身
當自愛敢謂君少恩

彭炳

明簪

明簪倚脩筠撫摯自清絕明河夜無聲茅亭四檐月露
寒鶴夢醒山花落香雪白雲雖無心今宵倘怡悅持杯
欲問之忘言楚天碧渺然思美人芙蓉似顏色乘鸞明
月中青霞擁鸞翼冉冉別離時吹簫苦幽咽

長絲曲

青池秋高霜露繁蘆葉浸水長闌干風吹枯荷雙白鷺
池上木落雲漫漫蕭蕭馬鳴燕草殘小窗清砧山夜寒

乾坤如繭繅未了古今長絲千萬盤

濁酒

濁酒歌明月清吟不解愁此心無險薄何處有恩讐春
水涵青澗桃花繞白鷗乾坤如小艇罷釣足優游

武夷宮

仙人縹緲踏春鴻月落青峰第幾重琪樹雪中巢一鶴
石壇秋後蟄雙龍古時有冢埋黃帝今日無人見赤松
獨愧曾孫幔亭上翠華同醉玉芙蓉

懷關中故人

長安三月酒如酥
花落平隄水滿初
楊柳簇門齊下馬
九龍池上看文魚

小橋

落花如雪馬蹄香
幾樹黃鸝欲斷腸
行到小橋春影碧
一溝晴水浸垂楊

楚雲曲

花梢溷雨溼春泥
花底縈愁兩燕低
小院玉簫檀柱冷

楚雲凝夢上安西

劉叔遠

寄黃士謙

放歌出東邨思弄山上雪清風吹湖波驚散波上月美人載美酒舉櫂搖秋霜把酒勸青天青天忽盈觴揚帆挂白雲鷗鷺同飛揚歌罷一長嘯忽然江水長懷君不可見流恨滿瀟湘

江垕

李陵泣別圖

黃雲黯將暮白日寒無暉送客度河梁惆悵難別離胡
馬雖善行按轡姑遲遲初心孰予察後罪甘誅夷君老
既堪去我乃無家歸陽春滿皇都長負平生期

吳炳

古鏡

雁去悲銀海螭蟠泣鬼工黃腸迷漢柏野火上秦蓬濃
翠疑螺黛鮮硃潰守宮漆添燈暈黑文滅繡奩紅一旦

珠還浦千年劍出艷霧餘空黯淡雲在月朦朧伏獸銜
絲結蒙絺畫羽蟲粉綿施宛轉臺玉刻玲瓏匪茹曾申
誠惟明可保躬他時錫盤鑑來照夢中熊

趙半閑

止言

蘇張舌如戟危人亦危身期期周御史千載稱直臣清
談每敗事諧謔良損神田翁有斗酒招呼聚比鄰所言
惟桑麻語語不失真

張輿

西泠橋

紅藕花深逸興饒
一雙鸕鶿避鳴橈
曉風涼入桃花扇
臘酒香分椰子瓢
狂客醉歌明月上
美人歌斷綠雲消
數聲漁笛知何處
疑在西泠第一橋

白仁壽

書事

大羹元無味
大章本希音
音繁入人耳
味美適人心
是

以保身難惴惴如臨深百戰苟一失勇氣未足歛今若不學古後何法于今

陳廷言

錢塘懷古

越水吳山共寂寥已無遺老話前朝海門三日潮聲歇
天目千年王氣消夜月烏啼龍井樹春風花落海鮮橋
威儀文物今何在回首浮屠倚碧霄

孫唐

題定海七堦

堦影參差倚殿庭好山晴湧屋頭青
土龍剝目潭波息藥草成金佛藏靈
白鳥破煙江樹曉黑鼉吹雨海雲腥
禪房似隔人間世一榻松風晝掩扃

王東

同鎮陽李先輩登臨川擬峴臺

楚塞蕭條客復來已無秋渚鶻花開
西風曠野孤城出落日空江白浪迴
山似襄陽非故國地連吳會有高臺

南遊萬里頻回首潦倒徒傷賈傅才

趙春洲

感事

美人休唱渭城歌芳草依依自碧波可與共言今則少
不如意事古來多青天浩月元無礙白日黃塵欲奈何
却笑江湖釣鰲手十年畱滯負漁蓑

李源道

燕中懷古

荆卿墓上草離離郭隗臺邊對落暉戰國山川秋氣壯
中原豪傑曉星稀乾坤納納無人識南北年年有雁飛
說似盧溝橋畔柳安排青眼送將歸

李隼

僊遊山道士余岫雲為虞公于華蓋山作黃茆岡
隱居喜而有賦承命次韻

曾謁朱衣拱帝關故辭黃閣老人間鼎湖夢斷龍髯遠
遼海歸來鶴羽閒教種芝田經雨過看鋤藥圃帶雲還

絕憐此日都忘世渾似當年未出山

名山自昔伏龍岡勝地今為卧鹿場無復僊人飛羽駕
還聞學士結茆堂晴嵐蔽日雲當戶陰瀑吟風雪滿牀
已喜閒居親紫蓋不妨幽夢隔奎章

送危太朴還京

九重閭闔啟朱扉宮樹陰陰晝漏稀東觀日華浮象闕
上方雲氣動龍旂平明玉殿傳宣入薄暮金門待詔歸
最說相如才調逸賦成三署有光輝

宴秦公子宅贈女樂崔供奉

曾緣玉貌侍君王供奉金門一一行歌動綵雲飛閣道
舞回花月度宮牆城頭夜咽銅龍水帳裏春銷寶鴨香
今日還聞天上曲休辭爛醉紫霞觴

送鏡上人往廬山

雲滿袈裟月滿船匡廬何處定安禪屏風九疊啼猿裏
瀑布千尋度鳥邊林下繡經依寶樹花間洗鉢踏金蓮
虎溪若見陶居士不說高僧惠遠賢

同王元徵宴陸仲開宅

吳中花月為誰濃，醉殺松江陸士龍。
綵檻春風圍芍藥，畫簾秋水對芙蓉。
歸時粉黛佳人擁，行處軒車上客從。
不惜千金將宴樂，華堂日暮起歌鐘。

卞宜之

鐵筵詩寄楊廉夫

一段清水百鍊剛，曾翻宮徵侍虛皇。
裂開黃鶴磯頭石，驚落青鸞鏡裏霜。
仙子佩環新樂府，翰林風月舊文章。

道人清節磨礪久却笑桓伊獨據牀

國王一人

陳益稷

元史至元中安南王陳益稷來朝仁宗皇慶中加
恩制詞曰委質為臣既去逆而効順以爵駁貴宜
崇德而報功銀青榮祿大夫安南國王遙授湖廣
等處行中書省平章政事陳益稷知畏天者事大
則保境以全民慕帝王自有真能見幾而蚤作懼
祖宗之不祀特自拔以來歸拯溺救焚從王師凡
一再舉授粲適館畱湖右幾三十年身歷事於四
朝志不渝夫初節是用加新秩以示恩仍舊封而
授職可加金紫光祿大夫安南國王依前遙授湖
廣等處行中書省平章政事按益稷本閩人其祖

奔安南王李氏國則
宋嘉定乙酉間事也

大明殿侍宴

班陪玉筍侍紅雲日表熙熙瑞氣溫萬派朝宗滄海濶
衆星環拱紫宸尊雍容湛露歌詩什彷彿釣天入夢魂
孤孽秋毫皆帝力願殫忠赤報深恩

輓河南王

美人萎矣柱梁傾回首西風涕淚零三世功名今古史
百年過客短長亭手扶紅日名猶在身就黃梁夢不醒

記取汾陽舊勲業紫薇畱種繼芳馨

駕畋柳林隨侍

仙仗平明擁翠華景陽鐘發海東霞千官捧日臨春殿
萬騎屯雲動曉沙白鷁翻山霧薄黃龍旗拂柳風斜
太平氣象同民樂南北梯航共一家

送元復初

江流脉脉草離離黃鶴磯頭酒一卮報國寸心憐我老
論交半面識君遲正當重鼎調梅日又是長亭折柳時

滿載詩書歸路遠鳳城依約更相期

秋曉睡覺

海水盈盈漏轉籌霜風吹角出譙樓夢回淡月五更曉
心遠孤雲萬里秋玉帛幾年賓上國詩書半世老中州
平生事業渾如昨無奈青燈照白頭

萬歲山侍宴

碧落鳴鸞隔世塵玉京開宴會星辰舞回黿背三山雪
酒上龍顏萬國春物被仁風榮御苑水涵聖澤溢天津

越南羈旅陪賓列咫尺光瞻日月新

謝青宮賜酒

黃封星使控麒麟騰踏高風拂路塵
仙醴釀成天上露宮壺分賜臘前春
恩沾南紀波濤濶氣轉東皇草木新
拜徹雍容歌既醉遙瞻鶴禁喜津津

巴陵雨中

鴉拂平林雁陣空黃花行李老秋風
如何一夜江南夢盡在巴陵細雨中

羽士二人

吳全節

別號閉閣居燕都從江南移植梅花護以帷
帳扁曰漱芳囑咏自得時稱為閉閣宗師

六月六日早朝寄山中諸友

五年四覩六龍飛又領羣仙覲紫薇金殿煙霞浮黼屨
瑤階日月麗旌旂羣臣奉璽勤三護國母臨朝重萬幾
遙食蟠桃知幾次客星還照釣魚磯

送原功大監南歸

漸覺文星闕下稀
奎章兩見送行詩
渭城朝雨歌三疊
湘水秋風賦九疑
國典紬金藏鳳闕
詞臣步玉即龍墀
帝前時有蒼生問
可向江南久別離

送虞伯生使蜀

送別應思舊所經
秦川花柳短長亭
三峰高拊仙人掌
萬里先占使者星
錦水東流江月白
潼關西去蜀山青
當年不盡登臨意
待爾重鐫劒閣銘

獲玉印

三茆山道童遇白兔入穴掘之得一玉印乃九老仙
都君印宋宣和時物也

瑤璫篆刻鎮華陽猶帶宣和雨露香玉兔有靈開地藏
金童無意得天章九重臺上增春色萬里書中耿定光
喜遇明時薦神瑞三君珍重護宏綱

張雨

字伯雨錢塘黃冠師宋張九成之裔也別號真居
後入華陽洞又號句曲外史以其能詩也故從遊

皆一時
名士

題墨蘭贈別于一山之京師

三月愁送客春寒雨如霰冥冥返塞鴻悄悄栖梁燕揚
帆五十日蓬萊望中見欲持猗蘭操一奏南熏殿

雪齋

騎驢吟雪詩煮茶煎雪水何如掃一室置身虛白裏君
家有故事高卧殊未已

張師夔畫謝家池塘

春風颯然至幽人午夢醒遙見池塘綠不知春草生如

何騎馬客亦向夢中行

蘭雪齋為金壇王敬賦

謫仙有妙語清風洒蘭雪高懷千載下子獨慕芳潔春
冰斷瑞花晨露滋奕葉端居味道腴光景庶不滅

再賦天池

龍從古墩丘泓潭浸其股金碧爭蕩磨穿穴稍旁午斬
松羅石榻玄芝錯神許遙應玉女盆潤及黃精圃

濱洲雲巢圖

張彥輔畫

蒼山不受寒裏以白氈羅借雲以為暖我意不在多小
營丹鶴巢高栖翠雲柯飛仙度鸞笙老人卧雞窠誰能
江海去風雨一漁蓑

十月十八夜震澤風大作明日大雪異常又明日

甲子日出大寒

弱齡逃世網一勇以求志折旋四十載竟日坐有累大
拙使為巧小樸使為器用是役於人夫豈足言智飄風
鼓具區如我長噫氣追惟年運往通夕遂忘寐聖人罕

言命天道殊難致委順待未來餘日敢終棄

次韻晉卿翰林贈陳秉彛

金華黃太史出為儒臺冠詩文齊六經竒古誰敢傳如
掇明月珠妙在九曲穿而子工筆札狗監非所薦挈之
登龍門果獲尾時彥孜孜勤執經奕奕形染翰敏手不
暇給精華且屢換憐才吾輩事子乃羞自獻由茲數來
往無事輒相見湖嶺錯紆煙霞爭變幻一夕快雨餘
春物已消半言歸天台奧俄頃語離散此手不易執明

日柁樓飯迢迢望白雲瀑布聲湍悍赤城跨滄海朝霞
以為岼倘遇仙者徒勿易樵牧賤予衰志求道千載猶
暮旦老經三百家一一理殘卷霜毫犯冠籜墨汁滓衣
汗何功使願果盡力輪老腕子書能瘦硬振眼秋隼健
唯餘篋中字照我目光爛送子望崕返回目窮海甸春
夕豈不短反側移漏箭纔夢金庭遊還逐濤江亂洊知
家庭樂旭日陰始泮身扶老人杖衣憶慈母線還期當
及時遲子秋水觀栖栖寡儔侶孤坐至日晏追步太史

作用以申繼繼

春山晴靄圖

危亭面縣瀑溪塢著茅堂羣木相掩薄風披如有香避
世真樂土欲往川無梁隱淪倘見招歲暮從徜徉

天池石壁

嘗讀枕中記華山閼中吳神泉發其巔青壁繚其隅春
風四山來羣綠互紛扶羽觴曲折行浮花與之俱採珠
蹇辟荔洗玉弄芙蓉漫叟頗好名石壁作魚湖鴻乙志

草堂桃煙遂成圖而此條煩機閱世如撈蒲發興雲林
子隻手與我摹居然縮地法挈入壺公壺

晉彥博士以詩索和甚媿卒然

鑿澗盛春雨新流遶舍前何當畱太白相與學思玄碧
洞無人掃丹梯有路緣催詩古云迫莫笑疎鳶肩

輔成觀張上卿墓廬

青牛謝車御白鶴嘆人民閣有凌煙像橋無進履身平
生玉櫺具此地石麒麟蕩蕩傳宗業中朝倚外臣

風雪中得金陵諸公書

雪作衆禽驚窗幽亂霰鳴愕然身獲落莫矣歲崢嶸松
竹聊娛拙乾坤苦忌名故人不相貸書札到柴荆

天谷菴

宣和金壇郎郭
高士之居也

十三科取士救世豈無方倏送孤鴻舉難追八駿驤金
壇猶著號碧落舊為郎劍化丹鑪在山寒井水香

碧玉菴

四明
袁氏

廿四品前客能忘賀監居乖龍噴草檄古象泣遺書把

袂風塵表近公冰雪如時來青瑣闥晚節要蘧廬

湖寺擁碧軒

喧寂一塵隔湖濱出寶坊荷陰分補衲水氣禱燒香書
勘烏皮几茵敷白氍毹從來已公屋詩客許徜徉

萬致柔還省親舍僕往候之道中得此

數里平岡路仙山迹漸分柴荆來鵲語村落去人羣粉
陣松崩雪濤頭日濯雲不緣停僕御直以候夫君

寄洞庭王子正

洞庭山簇簇銀闕翠芙蓉安得滄浪子同尋縹緲峰魚
龍隨水落橘柚待霜濃未必桃源似雲帆躡去蹤

孤山晚步寄中庸子

瑪瑙坡前立荒陂接葑田試從樵子徑往覓僕夫泉衆
草寒猶短羣峰晚更妍誰歟結真隱共老太平年

十二月三日雪

快雪真無價豐年定有期臘前才一白至後已多時玉
展琳琅步花團蛺蝶枝春風在天上飄入萬年池

煮石窩

仙人白石子服食受奇方
王烈猶餐髓初平枉叱羊
砂牀收箭鏃玉屑備糒糧
借爾彌明鼎行窩到處將

良草堂圖

鄰近方隅洞良常別有天
草堂朝看雨藥圃夜春泉
邈矣盧鴻乙奇哉魯仲連
君看遺世者若箇是神仙

齋居偶興

絕澗多靈石中開小洞房
醉醒依竹素晴雨看梅黃
樹

暗鶯聲澁巖虛水韻長未能超賈馬自足上羲皇

午日東楊廉夫

客有擁琴至吾寧折簡招足音垂谷口雨氣截山腰酒

倩紅泉瀉花為絳節朝不嫌泥潭極一舸段家橋

今人呼段

橋為斷橋者誤也

礧北梅三月始華

陰礧殘梅枿臨流一向敲但存孤注在敢恨一生遲凍
雨如相照春寒不受吹後時翻見獨宰物遂成私

積雨

飽聽三峰雨閒題七月詩
水濱荷意怯田冷稻心遲
蛙黽陰爭盛蛟龍勢亦隨
蒼茫不可問身外付雲移

早秋

每嫌新酒少尚喜故交稠
籬落三家墅梧桐十日秋
月生微顧兔星淡沒牽牛
亦欲觀多稼江湖雨未周

乙亥元日試筆

四日
得春

自古三朝節于今一笑看
問年書亥字獻歲出辛盤
黔

突多蒸朮紅冰臍浴丹行行追勝事步步掃春寒

碧筒飲

採綠誰持作羽觴使君亭上晚樽涼玉莖沁露心微苦
翠蓋擎雲手亦香飲水龜藏蓮葉小吸川鯨恨藕絲長
傾壺誤展琳琅袖笑絕耶溪窈窕娘

上京賜宴王耆叟有詩次韻

從事何緣過草堂行都遣賜玉壺方遠勞使者紅塵騎
爛煮仙家白石羊中聖敢辭千日醉承恩獨許四明狂

金莖賸有三清露潤及葵心向太陽

天師素華閣

仙家樓觀風塵表更築凌空月榭高
虛白豈知存夜氣太清還許隔秋毫
溪光澹澹水填壑松響離離雪舞濤
此去銀橋通咫尺神山直下有靈鰲

自遣

一一花栽繞屋廬半春多雨意何如
緣詩太瘦終無補與酒全交漸要疎
硯席畱香非長物齋庖得筍是佳蔬

鶴羣催喚同來飲新淥濺濺已滿渠

元日雪霽早朝和辛良史廿二韻

纔設中庭燎俄看密霰飄歲開環甲紀星動指寅杓鳳
集天門榜珂鳴月殿橋卿雲同四表和氣集三朝陞級
昉初截雲層玉旋雕勾陳分彩隊步輦簇青腰積屑承
盤重吹花到笏消逶迤光黼座凌亂綴珠翹樂奏鑪煙
合班隨翠袖招閑風遊廣漠玉局道逍遙北戲魚龍舞
中巖虎豹調旌旗攢顛顛冠劍掠招搖穆滿曾觴母洪

岿及見堯萬年臨紫極一白慶璇霄朝會儀如此騫騰
意頗饒身唯參寂寞世豈糾紛囂姑射消疵癘蓬萊倚
沆寥瑤華攬戴勝珠樹引回鑣有術探鴻寶何人識爨
焦竟須窮海岱直擬並松喬書就神牀寫香從別室燒
憐君守華省琢句廢春宵

書懷二十韻呈虞集賢

昭代千齡運斯文一柱功初當延祐日晚識廣陵公朝
士因推轂先生猥擊蒙睽乖遺廿載寤寐接孤風太史

山川彥仙儒館閣崇置身清切上用志杳冥中句法黃
初過才名冀北空朔南馳使節江漢借歸篷酒問餘杭
姥泉尋六一翁境非秋水觀寺即紫微宮侍坐要王遠
移家近葛洪於焉承咳唾足以振罷癯卓爾身為貴胡
然老見攻戰肥終道勝德重豈遂窮玉趾閒迂步麻衣
病鞠躬茶煙窗再惹墨沼樹玲瓏饑甚無瑤草招來有
桂叢論心何落落把袂輒匆匆易進乘軒鶴難追戲海
鴻明朝去吳會長笑為誰雄

東漢高士詠

封君達

入山服黃連還鄉騎青牛借得

一作問

五嶽圖一去三千

秋

左慈

老瞞實雄猜乃忌仙者徒鱸魚既可鱠蜀薑不可無

向長

貴誠不如賤富誠不如貧自無子平易孰悟損益因

范丹

破甑久生塵短衣不掩骭還渠一斛麥所拾已襍半

龐德公

卧龍拜牀下劉表安能屈照見採藥踪猶遣鹿門月

薊子訓

欲追薊先生白雲迷其方驢鞭不可執

一作振

壽與銅狄

長

韓康

公是伯休耶賣藥價不二却問奪牛翁徵君當過未

法真

逃名名我隨避名名我追去去南北山與世從此辭

奚官洗馬圖

曾侍赤墀東天池看浴龍晚涼湖上夢猶立柳陰中

明皇按樂圖

髯伶識樂句我信曲有誤月白商聲多塵起漁陽成

夜思

空山嘈夜雨幽人坐惆悵今夕楚礪泉明日秦淮浪

煙梅睡雀墨戲

珍偶偏憐瓊樹寒香漠漠紛紛誰見羅浮月黑一枝同
夢梨雲

妝鏡

璧月朝朝瓊樹明星處處阿房不似千秋鏡裏與人能
鑒興亡

元統元年十一月句曲外史菌山巢居成詩以自

見 三首

望見飛檐松杪花下盤陰洞石聳牙老樵迷路疑一作驚

相問若箇江東道士家

縹緲洞庭連白雲綠橘黃柑能見分昨日扁舟尋好事
明年處士比封君

谷中僅有一菴住壇上累累白石陳杖隨流水過鄰舍
席與長松分主賓

松下淵明圖為鄭明德作

歸來不為督郵輕自愛松根長茯苓博浪金椎拈不起
倚鉏却讀相牛經

寄題陳生華山圖

二首

西祀曾尋箭筈天雲臺石室故依然雪驢嗅地鞭不起
一笑太平三百年

華嶽秋高不受寒虎頭粉墨意蕭閒赤城別有思仙夢
長在明星玉女間

海粟松雪酸齋雜書一卷戲題于左

長沙老筆混狂瀾

一作戲波瀾

刮耳鷗波點素紈

一作松雪憑誰染素

紈翰墨風流作三笑最憐白紵一生寒

凌波仙

春雲如水碧粼粼誰見凌波襪上塵洛浦湘皋都是夢
手中花是卷中人

吳興墨蘭

墨君石友是同叅幾葉光風染碧嵐悵望王孫杳何許
年年芳草滿江南

叢讀葉靜齋草木子中一條云趙仲穆者子昂學士之子宋秀王之後裔

也能作蘭木竹石有道士張伯雨題其墨蘭詩曰滋蘭
九畹空多種何似墨池三兩花近日國香零落盡王孫
芳草遍天涯仲穆見而媿之遂不復作所記
與此詩意正合而集中無之因附見于此

爛柯圖

一局棋殘爛斧柯山中日月竟如何歸來記得神仙著
不比人間局面多

讀臨川集

班馬文章老琢磨皋夔心跡半彫訛執鞭願作鍾山吏
一袂字書隨白驪

東坡書蔡君謨夢中絕句二放營妓絕句三虞伯
生題四絕于後真迹藏義興王子明家要予次

韻五首

日將公事湖中了醉入重城列炬明自古大藩財賦地
古人偏得賦閒情

謝女嬌吟雪比鹽北臺馬耳見雙尖衲衣政索歌姬笑
不道春寒繡被添

寫韻軒中塵不驚與誰同躡鳳凰翎綵鸞可惜情緣重

只合清齋寫道經

釵頭新綠荔枝紅
那與江桃色味同
聞道端明新進譜
一時殿閣起熏風

香辟春寒玉辟塵
流蘇斗帳醉和春
一雙明月都無價
寂寞人間第二人

山中

一枝石瘦如磨角
六出花開似麝臍
隨意莓苔一杯酒
也勝騎馬聽朝鷄

李仲賓雪竹

斷縑黯淡何人墨
四十年前老薊丘
向使戴家多種竹
雪中那肯便回舟

子昂墨寫萱草

碧浪湖頭翰墨香
山蜂遊趲午陰涼
戲拈小筆塗幽草

正自無憂得可忘

亦有
諷意

臺掾薩天錫求識予面而之燕南八月十四夜風

雨宿茵閣明日追寄此詩

四首

李公求識少陵面未聞草堂三日留看君用意古人上
却愧無言與獻酬

鶴臺道民掩柴扃雁門才子宿寒廳恰有金華一樽酒
且置茅家雙玉瓶

巡官畏虎盛前呵驚動燕山薩照磨剪燭對牀詩未穩
從渠醉尉問誰何

走送蒲衣菴外路歸時望見赤山湖林子求看換鵝帖
胡郎傳送捕魚圖

緝熙殿御製墨梅詩帖

宣和妙賞縉衣句傳在夷門作勝談行殿春風四十載
玉妃終老向江南

葛嶺禱書

小娃小艇無蹤跡只有荷花雨濺裙淨洗一方天水碧
不教歌板污遊雲


避暑圖

雪藕冰盤斲鱸厨波光簾影帶風蒲蒼生病渴無人問

赤日黃埃盡畏途

白無咎黃蜀葵

金銅仙人雨中立鉛淚恰如辭漢時傾心脉脉何所待
願見白日光陸離



宋元詩會卷九十九

欽定四庫全書

集部
宋元詩會卷二百

詳校官中書_臣陸 湘

主事銜_臣徐以坤覆勘

總校官知縣_臣繆 琪

校對官中書_臣嵇承志

謄錄監生_臣胡宗高

欽定四庫全書

宋元詩會卷一百

兵部主事陳焯編

衲子十二人

中峰本

法名明本講席之盛為東南第一住天目
山中峰趙孟頫歸依甚虔以師禮事之

咏葫蘆

秀結團圞帶晚秋偏從根本易綢繆牆頭恍忽懸明月

架上依稀綴碧旒密貯神僊三島藥穩乘羅漢五湖遊
他年剖破成雙器半贈顏回半許由

疎梅

依稀殘雪浸寒波桃李漫山奈俗何瀟灑最宜三二點
好花清影不須多

苔梅

古貌蒼然鶴膝枝吐花生暈護春機玉堂試看青袍客
莫忘江南有白衣

憶梅

十分明月是揚州尚有春風在樹頭
莫怪當年何水部
歲寒心事與誰愁

評梅

月旦花前豈乏人風霜齒頰帶陽春
江南野史餘芳論
絕世清如古逸民

惜梅

香銷泥汙意徘徊掠地迴風玉作堆
愁絕黃昏無一語

怕看孤月上窓來

茅舍梅

數椽草屋延清客竹作疎籬護玉葩
不是玉堂無分到
且和明月到山家

風梅

花間少女剪春寒粲粲霓裳舞隊仙
月夜遙看環佩冷
莫教吹落玉花鈿

煙梅

夢隔梨雲逗曉天
苔枝浮翠逗春寒
不嫌玉質籠輕素
留與詩人冷淡看

怨中

贈道士凌雲峰

坐夏不出戶
塵緣淨于掃
羽客苔溪來
訪我無生道
無生不可學
可學成綴擾
有物天地先
冥冥還杳杳
仙凡本一致
明悟當及早
蹠蹠豈永年
顏冉未曾天
南薰破炎熱
濃綠鶯聲老
與子兩忘言
塵寰即蓬島

不歸篇

昨日又不歸今日又不歸竟自無歸日勞我長歔歔歔
歔為何事憐此忘家子棄卻祖翁業向外圖經紀歲月
苦無多悠悠水上波心源未昭廓奈此生死何

歸來篇

歸來兮歸來歸來免攀陪山泉甘露味草座黃金臺人
生當自足自足真天祿寧為擊壤歌莫作窮途哭一法
不留情青山四時青折松拂石坐白雲林外行

無言歌為真如本長老作

無言歌無言之道言難傳機頭領略猶鈍漢句後解會
知徒然我本有口且無舌興來不妨歌一闋七金山外
覓知音引得虛空笑聲咽君不見空生寂寂巖頭坐匝
地天華亂飄墮又不見毘耶病夫施一默潦倒文殊歎
無及兩處牢關盡掣開白日青天轟霹靂

箴仲規扁所居為清白居

道人宴坐清白居身心不動長如如月窟深藏雪獅子冰

壺靜貯銀蟾蜍絕色純真妙難測中下焉能造其域不修
梵行事空王豈守邪禪作家賊縱橫廓落含十虛三尺丈六
攜手歸徹骨風流祇者是六門日夜揚光輝靈利師僧近來
少徃徃多從外邊討本無階級坦然平到此定應先踏倒

一笑軒為宗旨南州賦

一笑軒中行復坐青山白雲不可唾六戶虛凝絕點塵
經案銅餅安一箇靈山對衆拈花時百萬龍象徒蚩蚩
金色頭陀獨解事輒然微笑揚雙眉笑邊真旨憑誰委

木强楊岐未相許客來不必更躊躇
便應識取軒中主
寄宗聖西堂

宿有扶宗志辛勤四十年句清堪供佛業白可箋天燕
坐畦衣薄經行雪頂圓長庚光欲滅內院一燈傳

熱

大地爍金石禪心只宴如幽閒無濁慮鬱勃自清虛坐
石頻揮塵臨流看躍魚優游三界內寒暑不關渠

謝靜中過訪

掃跡千巖裏柴門久不開
正逢新雨足忽見故人來
燒筍供茶椀烹薇薦粥杯
欲畱君共住分石坐堆堆

題王山人草齋

築室島溪上松門日夜開
家貧無雀入山好有僧來
雨漏重苔草年淡旋積苔
繞檐梨與栗祇為子孫栽

元叟端

擬寒山子詩

四首

木落秋水寒千峰正岑寂
惟聞虎嘯聲不見人行跡
霜

露溼巖莎月輪挂空碧此時觀此心獨坐盤陀石
名利是何物人心不自灰榮來終有辱樂去可無哀富
塚草還出貧門花亦開耕桑枉辛苦鬚白鬢毛衰

山中高且寒人罕來登陟松搖雪珊珊蘿宵烟冪冪巖
華春不開潭水夏方釋住此夫何為心源湛而寂

我住在峰頂白雲常不開窗扉沿薜荔門徑疊莓苔山
菓猿偷去巖花鹿獻來長年無一事石上坐堆堆

山居 二首

山木交柯莎滿庭馬蹄且不污巖局篝燈對雪坐吟偈
擁襪繞泉行課經睡少每知茶有驗病多常怪藥無靈
金園一歲一牢落誰似孤松長自青

小榻新營巖瀑西白雲無路草萋萋月明局戶野猿嘯
日晏擁衾山鳥啼積世詩書空簡蠹累朝墳墓半鋤犁
邯鄲枕畔一炊黍堪笑古今人自迷

題古鴈圖

年去年來又一年帛書曾達茂陵前影連薊北月橫塞

聲斷衡陽霜滿天
雨暗荻花愁晚渚
露香菰米落秋田
平生千里復萬里
塵世網羅空自縣

按趙子昂家居有以飛鳴宿食四鴈圖求跋者時詞
客滿座而端叟老禪亦預焉子昂屬客賦詩端公援
筆立成合座歎異乃潘訥叔以此詩入薩天錫集蓋
未之考也

山房自述

故園歸路隔天涯
絕頂閒房且寄家
繡罷貝多山月上

一簾華影漾袈裟

雪樵

珠霰飄飄柴在肩
且謀燒火過殘年
庭前此際無人立
爐內憑誰續斷烟

天上

天上日没月又出
山中葉落花還開
黃泉只見有人去
不見一人曾得回

題羅漢圖

諸諦空來世所無神通百變絕名模不知何處畱蹤跡
却被人傳作畫圖

楚石琦

名梵琦小字曇曜族姓朱氏母夢日墮懷中而生
九歲時趙子昂見而異之為鬻僧牒得度傳法於
徑山元叟端和尚帝師錫
號曰佛日普照慧辯禪師

送的藏主歸里

日本師僧皆可喜不憚鯨波千萬里捐軀為法到南方
如此出家今有幾苦參的是禪家流密證潛符更奇偉

從來佛祖是生冤肯認山河為自己五千餘卷紙上語
却笑癡蠅攢未已自家寶藏無一物盡大地人提不起
年窮臘盡歸去來東風入律梅花開

送天寧謚藏主回淨光

永嘉老子錯行腳被人呼為一宿覺曹溪只是箇樵夫
佛法何曾解參學三千威儀八萬行一霎清風頓銷鑠
偶然換得文字成盲子喚作真丹經泥中洗土不唧噥
畫蛇添足空丁寧看渠兩着渾未是學者焉能出生死

如來藏裏本無珠萬古虛名挂唇齒為我殷勤問淨光
永嘉老人應著忙說與如今甚時節莫戀松風與江月
送興藏主遊金陵

春山青春水綠一枝兩枝梅花開十里五里村路曲石
城雲影聚復散草店雞聲斷仍續莫言描畫心手拙此
景當前本奇絕誰能一字施品評簡盡五千四十八道
人笑我虛開口矢上加尖成漏透背却法堂穿草鞋井
溪綆短終難構

送徑山一藏主

一大藏教開葛藤盡大地人跳不出夢菴本是奇衲子
夜半扶桑吐紅日拈起凌霄峰頂茶却是洞庭湖上橘
三千世界菴摩勒放開捏聚誰能詰松風澗水自談玄
却笑區區論權實

送可禪人

即心是佛無心道不覺全身入荒草語拙今人笑古人
古人却笑今人巧後生晚長忌聰明且要低頭學老成

却憶南泉好言語
嚼渠癡鈍過平生

海屋

晉門道人索我歌
未免平地生風波
屋為海耶海為屋
海屋之義當如何
百千瀾渤從此起
起亦不離涓滴水
沃日滔天也大奇
卷舒只在軒窗裏

海東青行

海東青高麗獻之
天子庭萬人見之
不敢睨玉爪金眸
鐵作翎心在寒空
韝在手一生自獵
知無偶孤飛直出

大鵬前猛志豈落駕鵠後是日霜風何凜冽長楊刷羽
看騰瞥奔雲突霧入紫霄狡兔妖蕙灑丹血束身歸來
如木雞衆鵠欲並功難齊爾輩無才空碌碌不應但費
官厨肉

上都

避暑宜來此逢冬可住不地高天一握河雜水長流赤
日不知夏清霜常似秋向來冰雪窟今作帝王州

開平書事

二首

地勢斜臨北河流穩向東龍庭行萬里虎路達三巖邊
女裁皮服材官控角弓長吟對落景獨坐感飛蓬

夜雪沙陀部春風勅勒川生涯惟釀黍樂事在彈弦不
用臨城將何須負郭田雙鵬來海外一箭落天邊

漠北懷古

北向無城郭遙遙接大荒舊來聞漢土前去是河湟野
蒜根含水沙蔥葉帶霜何人吹觱篥南客淚沾裳

曠野多遺骨前朝數用兵烽連都護府柵遶可敦城健

鵲雲間落妖狐塞下鳴却因班定遠牽動故鄉情

石屋珙

本名溫清珙卜居雪溪之西地曰天湖所著詩偈甚富惟擇其雅者存之

天湖卜居

五首

林木長新葉遶屋清陰多溪草沒塵跡隔山聽樵歌自耕復自種側笠披青蓑好雨及時來活我新栽禾遊目周宇宙物物皆消磨既善解空理不樂還如何

月來照我門風來吹我襟勸君石上坐聽我山中吟玄

鬚化為雪朝光成夕陰萬事草頭露豈得長如今
種豆兩三畦離離覆原上不知陽和功惟言土力壯老
免伏崖根心心欲希望果能息汝貧吾寧不食醬

山中一雨滋原上百物好手種三畝薯亦可延昏曉吐
哉世間人名利常闕抱頭上雪紛紛胸中塵浩浩
結屋霞峰頭耕鉏供日課山田六七丘道人三兩箇開
池放月來賣柴糴米過老子少機關家私都說破

登霞峯

清明無事登霞峯
伸着望極開心胸
太湖萬頃白瀲灩
洞庭兩點青蒙茸
初疑仙子始綰角
碧紗作帽參差籠
又疑天女獻花至
玉盤捧出雙芙蓉
明知此境俱幻妄
對此悠然心未終
徘徊不忍便歸去
夕陽又轉山頭松

閒居 二首

道人緣慮盡觸目
是心光何處碧桃謝
滿溪流香草
溪蛇性悅日暖蝶心狂
曾見樵翁說雲邊
雪晝房

巖臺舒野望
依約見松門
唐代高僧寺
宋朝丞相墳
溪

光晴瀉遠野色晚來昏山路歌聲絕樵歸烟火村

雜詠 四首

滿頭白髮瘦稜層日用生涯事事能木白秋分春白朮
竹筐春半曬朱藤黃精就買山前客紫菜長需海外僧
誰道新年七十七開池尚欲種茭菱

自入山來萬慮澄平懷一種任騰騰庭前樹色秋溪減
檻外泉聲雨後增挑薺煮茶延野客買盆移菊送鄰僧
錦衣玉食公卿子不及山僧有此情

茅屋青山綠水邊
往來年久自相便
數株紅白桃李樹
一片青黃菜麥田
竹榻夜移聽雨坐
紙窗晴啓看雲眠
人生無出清閒好
到得清閒豈偶然

法道寥寥不可模
一菴淡隱是良圖
門前養竹高遮屋
石上分泉直到厨
猿抱子來崖巢熟
鶴移巢去磴松枯
禪邊大有閒情緒
收拾乾柴向地爐

絕句二首

茅屋低低三兩間
團團環繞盡青山
竹牀不許閒雲宿

日未斜時便掩闌

離衆多年無坐具
入山長久沒袈裟
單單有箇鐵鎚子
畱待人來煮瀑花

天如

示友人

塵網苦多累
暫閒如脫羈
胡為塵外迹
而乃東西馳
聚談每倉卒
既遠翻多思
眼前失真宰
身外何求知
百骸如僕馬
勢合聊相隨
氣運忽遷謝
一散無重期
來日不

可待去日不可追靜緣當自保世故方無涯

夜坐聞蛩

山人坐樹陰樹轉月當午江市夜猶喧笙歌雜砧杵寒
蛩亦何情唧唧如共語前聲稍悲悽後聲轉哀苦人心
汝莫知汝語人莫取萬類各有私悲歡豈同趣茫茫元
化中同一風氣使何如悟天真隨分樂生死

簞策引

西瑛懶雲窩距余禪室半里許時相過從吹簞策以

為供復于余言有所需乃賦長歌以贈

西瑛為我吹簞簞發我十年夢相憶錢塘月夜鳳凰山
曾聽酸齋吹鐵笛初吹一曲江風生餘響入樹秋嗚咽
再次一曲江潮驚愁雲忽低霜月黑坐中聽者六七人
半是江湖未歸客歡者狂歌繞樹行悲者垂頭淚沾膝
我時靜對同學人斂襟共坐松根石脫畧悲歡萬念消
悟聲無性聞無跡

遊三相臺示甘楊諸友臺乃姚崇牛僧孺劉沆讀

書處也

我登三相臺南望雙巖峰俯視下界如凌空開元老樹
可百丈斷崖盡日呼顛風甘郎攀巢學猿掛楊子枕石
飛泉中垂藤離地坐我穩袒跣長嘯如乘龍嗚呼昔人
不再得臺上土花幾秋色前身不與後身期白雲豈識
羅衣客

贈奕士高顯卿

對客將為顯卿歌顯卿去兮吾奈何商山莫招象山暮

當代如卿亦難遇不須殺活談兵圍我以氣色觀神機
秋鷹失兔草莽動斷道夜雪行人稀丹還金鼎會龍虎
海國破浪孤篷歸太初一黑盪摩裏萬化白戰搏空起
何曾一路無死生觀者紛紛少知此西來訪古崑崙丘
拔劍夜舞呼蒼虬登白鶴兮問王屋汗漫長歌紫芝曲
相逢安得聞此歌共笑人間殘局多

上海舟中即事

烏溪出閘催雙櫓急趨回潮下黃浦午前期到上洋城

生怕潮來近亭午夜潮已落岼痕高風卷浪花翻雪涵
渡頭趲度人如雞水行泥行亦良苦西岼衝波遠入村
東岼湧沙作林圃岼上居民無定蹤頗怪潮行無定所
吾年五十遊上洋今歲重來五十五豈無玉雪美少年
向來一揖成千古亦有鷗張萬石家勢去一朝無寸土
噫吁嘻人生幻化若浮雲陵谷變遷何足數

眞州送別悅希雲

欲別不別重相攜別思已逐寒雲飛飛雲一去不可得

千村萬落明斜暉回首望吳山滿目青依依亦如送我
望我去立盡風烟未忍歸

送時無擇維那歸閩

百計歸難禁生緣樂未窮聽鐘榔葉雨歌枕荔花風客
久閩音化交演楚俗通片帆明日遠雲斷海天空

重登秋月樓

病力甦新雨登樓看夕陽岼移江市遠州接柘園長村
晚烟催暝水陰雲送涼客中情味熟隨地得相忘

遊茅山雲林清遠之館

華陽有客似重來
新見雲林別館開
寒日半巖松鶴起
腥風萬壑雨龍回
琴牀流露滋瑤草
丹鼎飛春上玉梅
居者未知清且遠
人間咫尺望蓬萊

次韻送古潛縣宰

解印遙歸意若何
山人長憶舊相過
詞鋒稍見禪機熟
案牘不如吟卷多
花雨聽鶯春滿酒
柳風迴馬月搖波
賞心樂事皆動業
畱與溪翁溪女歌

登茅山市壇 二首

白雲剪作瑤壇雪
寒旭蒸開玉洞花
山北山南看更好
炊烟朶朶是仙家

郭仙清夜扣舷時
萬籟秋笙月一池
千載誰傳靈鳳曲
羽童吟作步虛詞

師子林即景

半簷落日晒寒衣
一鉢香羹野蕨肥
春雨春烟二三子
水西原上種松歸

卧雲冷室睡魔醒殘漏聲聲促五更一夢又如過一世
東方日出是來生

天隱

即事

春路晴猶滑山亭晚更長竹枯湘淚盡花發楚魂香

西湖

水光山色四無人清曉誰看第一春紅日漸高絃管動
半湖烟霧是遊塵

寒食

月暗花明揜竹房
輕寒脉脉透衣裳
清明院落無燈火
獨繞迴廊禮夜香

愚菴及

名智及字以中
吳縣顧氏子
入海雲院為沙彌
見廣智訢公於建業
與諸名流以詩句和同參訂之
歸海雲見秋葉墜庭豁然有省
後侍端叟居徑山
嗣具法席屢主大刹
宋景濂為序四會詩錄極稱之

荅東臯伯遠法師

東臯尊者隱郊墟小小屠蘇睹史居
切栢代香朝演法
卷簾進月夜抽書村園菓熟秋霜後
花徑苔生宿雨餘
心境兩忘諸幻滅更從何處覓真如

題師祖善權元翁小影

為愛團圞十畝園紅芳消後綠陰連
杖藜日涉真成趣
野菜時挑不費錢臨濟栽松親鑿地
仰山種粟自燒田
祖翁活計誰能會獨立南榮為惘然

金室泐

字季潭臨海人族姓周氏八歲從天竺笑隱學佛
二十受具居然有禪伯之稱寓意詞章尤精隸古
虞伯生黃晉卿輩皆引為方
外交所著詩文有全室外集

望河源

河源出自茂巴爾楚巴山西人呼黃河為瑪納斯牛
河為必里楚楚巴者分界也其山西南所出之水則
流入犛牛河東北之水是為河源予西還宿山中嘗
飲其水彼國人戲相語曰漢人今飲漢水矣其源東
抵崑崙可七八百里今涉處尚三百餘里下與崑崙

之水合流中國相傳以為源自崑崙非也崑崙實默
札拉其山最高大四時常雪有神居之

積雪覆崇崗冬夏常一色羣峯讓獨雄神君所栖宅傳
聞嶰谷簧造律諧金石草木尚不生竹產疑非的漢使
窮河源要領殊未得遂令西陲子千古笑中國老客此
經過望之長太息立馬北風寒回首孤雲白

登高丘而望遠海

登高丘望東溟溟水方蕩激中有怒吼鯨聳脊類峰嶽

鼓浪如雷霆噓煙噴沫雲霧冥揚鬣掉尾三山傾腹吞
巨舟者百十蝦蟹不足饑腸撐奈何驕悍當海橫官漕
賈船不敢行鮫人織綃機杼停神仙跼蹐逃蓬瀛天吳
既辟易龍伯亦震驚徒為蟲族長空有水神名制御一
顛倒含羞乞尋盟吁嗟彼鯨爾何獐恃其險惡雄勢成
若失此海水何以藏其形使居陸阜間轉眼遭剝烹海
濱壯士雙目瞪拔劍欲往心縣旌何不訴之於上帝天
威下殛無遺生立見海水清且平海光不動青瑤瓊

此詩

金史卷一百
為方谷
真而作

見心復

名來復字見心號蒲菴豐城人族姓黃氏禮南悅
楚公為師早有詩名遊燕京與虞歐諸君子交甚
善元末亂作航海至鄧止於定水寺明初被召極
承褒美後坐胡黨伏誅按稗史稱見心本姓明名
士淵曾官至正間翰林學士削髮為僧不知何據

送丁鶴年兵後還武昌

寇亂移家去鄂城白頭重到影竛竮田歸東里新編甲
墓指西人舊姓丁樵牧不侵經世變松楸無祭泣山靈

野棠花落啼鶯急一酹椒漿老淚零

奉東周伯溫左丞

學士風流玉雪標早陪鳳輦聽仙韶
光分蓮炬從天下香帶爐烟近日飄
書擬漢秦誇二篆史修南北見三朝
承恩曾記東來後繡斧光華擁使輶

山謳

閒占雲霞作近鄰芋田雖薄不嫌貧
五風十雨清平世萬壑千巖澹泊身
南嶽馬駒應有識西湖獅子總無人

金襴漫笑藏雞足傳到龍華是幾經

守仁

字一初裨史載與錢塘僧德祥皆在明初被召未幾俱罹禍想為智聰所株連乎

石蟹泉

神鰲馳水到禪家清出龍泓味更佳晴帶浦雲穿曉籀
暗隨山雨走寒沙玉臍圓映波心月瓊沫香浮沼面花
擬待春風招社客焚香來試九溪茶

和虞邵菴見訪福勝寺

老却黃花客未知回舟旬日漫相期
龍江話月銜杯久
懶迎看雲步履遲
天地長縣司馬記山川有待杜陵詩
錦囊收拾同誰讀側耳蛩聲入思時

德祥

錢塘人見
一初傳

過湖州

平生只想住湖州
僻性迂情可自由
一片水聲中倚杖
數重山色裏行舟
東林書卷貧猶買
西塞綸竿老未收

緩得歸程近寒食杏花春雨聽鳴鳩

香奩十人

盧希孟

巴陵人賈瓊妻盧魏公五世孫也元兵破岳州希孟誓不辱寫詩於衣帛自沈大江而死詳見郝經

巴陵女子行

自沈詩

退鷁落迅風孤鸞弔空影簪堅折白玉瓶沈斷青綆妾死志不移改邑不改井我本瑚璉器安能作溺皿借此

清江流葬我全首領皇天如有知定作血面請願魂化
精衛填海使成嶺

又裙帶中詩

我質本瑚璉宗廟供蘋蘩一朝嬰禍難失身戎馬間寧
當血刃死不作衽席完漢上有王猛江南無謝安長號
赴洪流激烈摧心肝

管道昇

字仲姬翰林承旨趙孟頫妻生稟絕慧詩詞書法
及繪事無所不通長子雍字仲穆婿王國器號筠

卷則王叔明之父也

奉中宮命題所畫梅

雪後瓊枝嫩霜中玉蕊寒前村畱不得移入月宮看

仁宗

命夫人書千文勅玉工磨玉軸送祕書監裝潢收藏因又命子昂書六體為六卷雍亦書一卷且曰令後世知我朝有善書婦人且一家皆能書亦奇事也

附漁父詞

人生貴極是王侯浮利浮名不自由爭得似一扁舟弄

月吟風歸去休

孫蕙蘭

傳若金妻性慧工詩年二十歸若金五月而卒

綠窗吟

窗裏人初起
窓前柳正嬌
捲簾衝落絮
開鏡見垂條
坐對分金線
行防拂翠翹
流鶯空巧語
倦聽不須調

小閣烹香茗
疎簾下玉鉤
燈光翻出鼎
釵影倒沈甌
婢捧消春困
親嘗散暮愁
吟詩因坐久
月轉晚妝樓

偶成

小窗今日繡鍼閒坐對銀蟾整翠鬟凡世何曾到天上
月宮依舊似人間

段僧奴

大理總管段功之女也其父有功於梁王博囉博
囉妻以女曰阿結主又復忌段功而殺之僧奴幼
知父冤時懷報仇之志將適夫家出手刺繡旗以
與弟寶因作二詩示之蓋孝女而兼智勇者也

志復父仇示弟寶

珊瑚勾我出香閨滿目潛然淚溼衣冰鑑銀臺前長大
金枝玉葉下芳菲烏飛兔走頻來往桂秀梅馨不暫移

惆悵同胞未忍別應知含恨點蒼低

何彼穠穠花自紅歸車獨別汨江東鴻臺燕苑難經目
風刺霜刀易塞胸雲舊山高連水遠月新春疊與秋重
淚珠恰似通宵雨千里關河幾處逢

曹妙清

字比玉自號雪齋錢塘人善鼓琴工詩行書點畫
皆有法度三十不嫁風操可尚嘗寫詩寄錢崖鐵
崖答之云紅牙管蒂紫狸毫雪水初融玉帶袍寫
得薛濤萱草帖西湖紙價可能高曹事母孝謹玉
帶袍其
家硯名

和西湖竹枝詞

美人絕似董嬌饒
家住南山第一橋
不肯隨人過湖去
月明夜夜自吹簫

張妙淨

字惠蓮錢塘人善詩章曉音律晚
居姑蘇之春夢樓號自然道人

聖湖曲

憶把明珠買妾時
妾起梳頭郎畫眉
郎今何處妾獨在
怕見花間雙蝶飛

薛蘭英

吳郡人與姝蕙英皆聰明秀麗能賦詩建一樓以處曰蘭蕙勝芳有詩數百首顏曰勝芳集楊廉夫製西湖竹枝詞和者百餘家薛見之笑曰西湖有竹枝曲東吳獨無竹枝曲乎乃徵其體作蘇臺竹枝詞十章大為鐵崖所賞自是名播遠近目以班婕妤好蔡文姬復出云

蘇臺竹枝詞

姑蘇臺上月團團
姑蘇臺下水潺潺
月落西邊有時出
水流東去幾時還

館娃宮中麋鹿遊
西施去泛五湖舟
香魂玉骨歸何處

不及真娘葬虎丘

虎丘山上塔層層靜夜分明見佛燈約伴燒香寺中去
自將釵釧施山僧

門泊東吳萬里船烏啼月落水如煙寒山寺裏鐘聲早
漁火江楓惱客眠

洞庭餘柑三寸黃笠澤銀魚一寸長東南佳味人知少
玉食無由進上方

荻芽抽筍楝花開不見河豚石首來早起腥風滿城市

郎從海口販鮮回

楊柳青青楊柳黃
青黃變色過年光
妾似柳枝易憔悴
郎如柳絮太顛狂

翡翠雙飛不待呼
鴛鴦並宿幾曾孤
生憎寶帶橋頭水
半入吳江半太湖

一窩鳳髻綠如雲
八字牙梳白似銀
斜倚朱門翹首立
往來多少斷腸人

百尺樓臺倚碧天
欄干曲曲畫屏連
儂家自有蘇臺曲

不去西湖唱採蓮

鄭奎妻

春詞

春風吹花落紅雪
楊柳陰濃啼百舌
東家蝴蝶西家飛
前歲蟠桃今歲結
鞦韆蹴罷鬢髮髒
粉汗凝香沁綠紗
侍女亦知心內事
銀瓶汲水煮新茶

夏詞

芭蕉葉展青鸞尾
萱草花含金鳳背
一雙乳燕出雕梁

數點新荷浮綠水困人天氣日長時針線慵拈午漏遲
起向石榴陰畔立戲將梅子打鶯兒

秋詞

鐵馬聲喧風力緊雪窗夢破鴛鴦枕玉爐燒麝有餘香
羅扇撲螢無定影洞簫一曲是誰家河漢西流月半斜
要染纖纖紅指甲金盆夜搗鳳仙花

冬詞

山茶半開梅半吐風動簾旌雪花舞金盤冒冷塑狻猊

繡幙圍春護鸚鵡倩人呵筆畫雙眉脂水凝寒上臉遲
妝罷扶頭重照鏡鳳釵斜壓瑞香枝

惜花春起早

胭脂曉破湘桃萼露重荼蘼香雪落媚紫濃遮刺繡窗
嬌紅斜映鞦韆索輓轡驚夢急起來梳雲未暇臨妝臺
笑呼侍女秉明燭先照海棠開未開

愛月夜眠遲

香肌半彈金釵卸寂寂重門鎖深夜素魄初離碧海端

清光已透珠簾罅徘徊不語倚欄干參橫斗轉風露寒
小娃低語喚歸寢猶過薔薇架後看

掬水月在手

銀塘水滿蟾光吐嫦娥夜夜馮夷府蕩漾明珠若可捫
分明兔穎如堪數美人自挹濯春蔥忽訝水輪在掌中
女伴臨流笑相語指尖擎出廣寒宮

弄花香滿衣

鶉聲響處東風急紅紫叢邊久凝立素手攀條恐刺傷

金蓮移步嫌苔溼幽芳擷罷掩蘭堂馥郁餘香滿繡牀
蜂蝶紛紛入窗戶飛來飛去繞衣裳

鄭氏允端

紀夢

麻姑古仙人夜夢忽焉覩面生看漸熟儼然一處女年
可十七八指爪長有咫高髻青霞衣餘髮散如縷自云
接待來三變桑田水近過蓬萊山弱水亦清泚招我西
池遊池頭遇董許余笑而不言飄飄自高舉

望夫石

良人有行役遠在天一方自期三年歸一去凡幾霜登
山臨絕巘引領望歸航歸航望不及躑躅空傍徨化作
山頭石兀立倚穹蒼至今心不轉日夜遙相望石堅有
時爛海枯成田桑石爛與海枯行人歸故鄉

聽琴

夜淡衆籟寂天空缺月明幽人據槁梧逸響發清聲一
韻再三彈中含太古情坐演聽未久山水有餘清子期

既物化賞心誰與并感慨意不已天地空崢嶸

憶妹

有妹隨夫婿之官在匡廬到今一年久音問絕來書近
聞羣盜起總在大江西所至剽城邑殺人血成渠不知
患難中生死竟何如懷哉鵲鵲原獨坐渺愁予

秋胡妻

婉彼魯姬姜出採林下桑遠人何處來下馬古道傍黃
金致微言少年為貴郎婦人秉素心鐵石填衷腸豈為

物所移古井波瀾揚為謝道旁子請歌行露章

耕牧圖

幽人薄世味耕牧山之陰自抱樸野姿常懷畎心行
行南山歌落落梁甫吟挂書牛角上揮鋤瓦中金飽飯
黃昏後力田春雨淡四體勤樹藝三生語浮沈巢父世
高尚德公人所欽伊人去已遠高風邈難尋撫卷空歎
息俯仰成古今

山水障歌

我有一疋好素絹畫出江南無數山筆法豈但李營丘
直擬遠過楊契丹良工好手不能遇此畫森然能布置
層巒疊嶂擁復開恠石長松儼相對板橋茅屋林之隈
瀑流激石聲如雷恍然坐我匡廬下便覺胸次無凡埃
此身但向閨中老自恨無由致蓬島布襪青鞋負此生
長對畫圖空懊惱

吳人嫁女辭

種花莫種官路傍嫁女莫嫁諸侯王種花官道人爭取

嫁女侯王不久長
花落色衰人易變
離鸞鏡破終成怨
不如嫁與田舍郎
白首相看不下堂

搗衣曲

男兒遠向交河道
鐵馬金戈事征討
邊城八月風霜寒
欲寄戎衣須及早
急杵清砧搗夜深
玉纖銅斗熨貼平
裁縫製就衣襖裙
千鍼萬線始得成
封裏重重寄邊使
為語夫君奮忠義
好將勲業立邊陲
要使聲名垂史記

題畫

誰寫江南景風烟萬里寬
金銀開佛寺紫翠出林巒
遠客馳行役幽人賦考槃
蒼茫無限意撫卷為盤桓

題明皇並轡圖

三郎沈醉後上馬玉環隨
如何西幸日不見並鞍時

題村景

點點青山翠欲流
短蓑漁子坐扁舟
荒村五月涼如水
茅屋扶疎草樹秋

咏橘

滿林霜落洞庭西
橘柚青黃照眼齊
念我已無慈母奉
故人書後不須題

秋窗書懷

詩骨從來不受肥
那堪衰病弗勝衣
朝來試把羅裙整
瘦比今春又半圍

水檻

近水人家小結廬
軒窗瀟灑勝幽居
憑欄忽聽漁榔響
知有小船來賣魚

宮人程一寧

元順
帝時

登翠鷺樓


淡月清寒透碧紗
小窗和夢聽啼鴉
春風不管愁深淺
夜夜開門掃落花

附見梅花尼

咏梅花

終日尋春不見春
芒鞋踏破嶺頭雲
歸來笑撚梅花嗅

春在枝頭已十分



宋元詩會卷一百